

嘉慶太平縣誌

三

嘉慶太平縣志卷之十一 下

人物志 二

仕進

古今人物出處二途而已官職有尊卑事業有大小
隨其自見記之均之出也則仕進已該人物之半焉
郡志劃仕進於人物外又或於仕進中分名臣宦業
嫌門類之多矣

宋

徐似道字困子號竹隱上垌人乾道二年進士初尉吳

江見知於范成大轉戶曹參軍入爲太常丞歷中書舍
人直學士院遷祕書少監出守郢州終朝散大夫提點
浙江刑獄公韻度清雅才華敏捷名重一時甯宗立皇
子洵公行制詞云爰建神明之胄以觀天地之心意味
悠長葉紹翁歎爲眞學士平生酷嗜書畫不屑屑於功
名貴耳集載其爲少監日朝聞彈疏坐小舟載菖蒲數
盆飄然而去道間爭望若神仙劉龍洲賀啟有云以載
鶴之船載書移買山之錢買硯皆其實事也然居官所
在以廉能稱退閒姓字不通州縣於里社歡洽最甚楊

誠齋品藻中興以來詩人公居其一戴石屏師事之著有竹隱文集

林鼎字伯和珠村人母夢二龍繞腹生伯和及弟叔和父興祥業賈徙黃巖城中東禪巷伯和登乾道八年進士授奉化簿有中貴人將入境縣設雜戲使攝尉迂百里外辭曰性不耐此且略吾地毋以迂爲也遷定海丞郡令受租稅聽民自概量吏不能侵漁與弟叔和俱受業晦翁之門家居晦翁薦脩水利謂其通達諳練爲衆所服起知侯官縣民服其教終日寂然庭無訟者性

剛毅不肯以聲色徇上官卽怒從容待之不少屈頌聲
徧民間欲中以罪不能也擢判均州未行卒葉水心志
其墓次子仲謀爲隆興司戶有名

蔡鎬字正之待時子世居白山初入武學以信義稱
司業高之上其行及登右榜進士孝宗識其名曰是非
戴幾先所薦耶以格授鹽城尉特改爲武學諭孝宗每
語周必大曰蔡鎬可喜對朕語皆著實緩急用之不孤
負人未幾自乞從軍孝宗曰三衙豈可以階級待學官
以諸生故被劾去旋召還爲博士樞密院以公能議使

往金賀正旦金使適來乃以爲館伴時以使辭宴詔改
茶酒又故事非奉旨館伴不過使位上中官甘弁奸異
同公不從弁諧於上然卒從公行又充接送伴使在道
深悉築瓦梁堰及重築楚州城之害力陳其不便孝宗
爲罷役公志在出力爲國會和議旣堅頗牧之才無所
展遂乞歸朱子爲浙東常平使者議建黃巖諸閘薦鎬
才可任朱去勾龍昌泰繼之鎬及郡人謝敷經支汝績
陳緯經營其間所建六閘增三閘皆一成可永久父喪
畢再召充賀使命未至而公已卒年僅四十九病革自

書多志已過勗子弟以孝謹且曰無求仕進五子淑滂
澤湛濟淑知新甯縣有政聲滂見知於葉水心後人懷
建闡之德立先賢祠堂祀羅赤城朱子及勾龍昌泰以
公數人配元林昉有記蔡由唐季立族白山十二世迨
公始顯自後書業相仍爲名族明洪武閒經抄沒子孫
遂轉徙爲氓隸永樂後僅有一名恕者爲村塾師左圖
右冊恂恂然猶有先正之遺風云

劉允濟字全之新瀆人與兄允迪後先成進士允迪厚
而敏官不甚顯允濟初爲婺州掌教歷太常寺主簿國

子監丞知南劍州福建常平提舉轉知永嘉軍以中奉
大夫提舉崇禧觀生平信道執德終始不變在南劍州
以民俗多溺女善誘而嚴戒之舉者給粟賑貸不舉者
罪之俗爲一變求羅從彥後人爲請謚於朝并進其所
作聖宋遵堯錄在永嘉與通判陳子雲知縣胡衍道等
僚屬一心利興弊革遠近翕然稱治周純臣每歎永嘉
人有福卒後杜清獻公範輓詩有甌閩看蔽芾有淚正
難收之語子坡孫溧水主簿

王居安字資道家方巖鄉自少見知於劉孝戣天才英

敏下筆千言省試第二人登進士廷試第三人授徽州
推官服闋改江西提刑司幹官使者王厚之厲鋒氣人
莫敢撓公遇事有不可面爭不少屈入爲國子博士首
言人主當以知人安民爲要改司農丞知興化軍條奏
行經界法以均賦役以廢利田十頃給士人廩膳擒劇
盜召爲祕書丞轉對論疆場事稱旨遷著作郎兼考功
郎韓侂冑之誅也公實首贊其決明日擢右司諫極論
侂冑奸邪誤國請肆諸市朝以謝天下右丞相陳自強
憚倖朋比乞追責遠竄以爲爲臣不忠之戒初侂冑欲

籍天下口使不議己太府丞呂祖儉以直言謫死布衣
呂祖泰亦以直言流遠郡公皆奏請明其冤劾郭倪郭
僎竄嶺表天下快之繼兼侍讀又疏言元兇旣殲正當
更化之時若用人稍誤是一侂冑死一侂冑復生也會
趙彥逾與樓鑰林大中並召公言鑰與大中用天下蒼
生之福彥逾啟侂冑專政之謀汝愚斥死彥逾之計居
多陛下乃使與二人同列邪正並用非所以示趨向於
天下也疏已具有微聞者除目夜下遷起居郎崇政殿
說書公爲諫官纔十八日旣供職卽直前奏曰陛下特

遷臣柱下史豈非欲使臣不得言耶二史得直前奏事
祖宗法也遂極論之又言臣爲陛下耳目官諫紙未乾
旣以忤權要徙他職不得其言則去臣不復留矣帝爲
改容御史中丞雷孝友論其越職言事詔奪官太學諸
生有舉幡乞留者四明楊簡邂逅於山陰道中謂此舉
吾道增重江陵項安世致書云左史人中龍也踰年復
官知太平州入對帝曰有用才也權工部侍郎知隆興
府已而盜起郴黑風洞羅世傳爲首勢甚張會江右李
元勵之兵亦起列城皆震朝廷以公爲帥督戰於黃山

大勝之賊懼走韶州勢日促遂命公節制江池召土豪
問便宜皆言賊恃險不可破公曰吾自有以破之矣會
元勵執練木橋賊首李才全至公厚待才全而賞元勵
衆皆感激羅世傳果疑元勵貳已遂交惡公語都統制
許俊曰兩虎鬪於穴吾可成卞莊子之功已而世傳嗾
練木橋賊黨襲元勵擒之以獻磔於吉之南門元勵旣
誅世傳負功益驕蹇名效順而實自保許俊請班師公
不許俾因壁固守居無何世傳果與兄世祿俱叛公密
爲方略遣官兵圍之世傳自經死斬其首以徇羣盜次

第平公之在軍中也賞厚罰明將吏盡力始終用計以賊擊賊故兵無傷者江右尸祝之刻石紀功徙鎮襄陽以言事罷閒居十有一年嘉定中與魏了翁同召遷工部侍郎時方受寶舉朝皆賀公入對首言人主畏無難而不畏多難輿地寶玉之歸盍思當時所以失言極切至居數年以保謨閣待制知溫州理宗卽位以敷文閣待制知福州尋陞龍圖閣直學士以大中大夫提舉崇福宮將行鹽盜起甯化命公專任招捕募軍校劉華邱銳授以計指期約與攝汀者不合力辭去卒贈少保宋

史與李文清宗勉同傳史論曰居安宅心空明待物不
貳又曰掃除羣邪以匡王國其志壯哉自號方巖老圃
有方巖集今從祀鄉賢祠

丁 木字子植丁隩人父世雄疏財禮士一時聞人如
東魯林景思龍川陳同父並至其家木因得親炙聞議
論又從葉水心王成叟遊故所學具有原本先補承信
郎幹辦儀鑾司閣門班登嘉定四年進士授池州青陽
縣尹政稱最建五溪橋便民來往勸官屋十八楹收餽
值爲學徒費土爭絃誦擢禮部郎右司諫轉左直言忤

權倖謫遷澧州通判有守城捍敵功家居有園亭之勝
朱子嘗寄題焉四方從學甚衆尊之曰松山先生著東
嶼稿其子儼梓以傳從子石字貫道號菊山逸民工詩
與戴石屏友善

葉應輔字子儀嘉定閒進士歷校書郎右司諫知明州
終敷文閣待制與諸葛希仁並臨海王公滋高第弟子
後王子子勉又轉師之王侍郎方巖於同鄉後進中亟
稱其文可以壽世先居舊邑與進士楊似雲同巷楊善
草應輔工行書時人呼所居爲草行巷繼自靖化鄉徙

鏡川郎中良佩之始祖也

戴 昂字景明號東野石屏從孫嘉定中發解於州任
贛州法曹參軍又嘗爲池州某職其自編東野農歌及
農歌續集皆寶祐時効官秋浦作人品清雅詩律純正
石屏所謂不學晚唐體會聞大雅音者也善畫嘗爲其
族曼卿作瀟湘片景圖意趣閑逸筆墨閒絕去畛畦之
迹 宋詩鈔謂嘉定
已卯登第誤

徐 烈一作照字大勝以父似道廕授建昌通判居官
清介嘗於治所構一室有中貴來議借館烈曰吾構此